

welden vnd dorzcu tochten, das der rath dirkennen wurde, welchem is denne der rath befilet, der sal iß leutterlichen durch got teylen. Wurde aber der erbe dorzcu nicht bequeme werden nach erkentniß des ratis, so sal der rat vngeuerlich macht haben, eynen bidderman ynnewendig adder vßwendig des ratis dorzcu czu setzen; derselbe gesetzte almosen geber sal denne von den benumpten czechen schocken grosschin vor syne muhe habin ierlichin virczig groschin. Ouch ab wir zekumffticlichin von der stat wegen solchin obinberurten zcins widder abekouffen welden, des sullen wir macht haben vnd sullen dauor gebin driehundert gulden rinisch an golde; dieselbigen driehundert rinische gulden sal der rath mit wissen vnd willen der almosen stiffter, die dorzcu togelich weren, nach derkentnisse des ratis widder an gewisse zcinse legen vnd dorumme kouffen als vil man der vmme solch golt gekouffen kan vnd den widderkouff thun yn aller mosse, als der vorige vorsigilte hauptbrieff ynne heldit vnd vßwiset vngeuerlichin. Des zcu warem bekentnisse habin wir obgenanten burgermeister vnd ratmanne vnnsers stat insigil wissentelichin gehangen an disen offen brieff, der gebin ist nach Cristi vnnsers lieben hern gebort tusent vierhundert vnd yme siben vnde fumfzigsten iaren am mittwochin nach Luciae virginis.

Nach dem Orig. im Rathsarchiv zu Dresden mit dem Stadtsiegel an einem Pergamentstreifen.

No. 285. 1458. 9. Apr.

*Kurf. Friedrich II. fordert den Rath auf, zwei seiner Mitglieder zu einer am 24. April zu Grimma stattfindenden wichtigen Berathung abzufertigen und empfiehlt Vorsicht vor ausgesendeten Brandstiftern und Mordbrennern.*

Friderich von gots gnaden hertzog zcu Sachsen ꝛ kurfurst, lantgraue in Doringen vnd marcgraue zcu Missen.

Lieben getruwen. Wir haben mit uch vnd andern den vnsern zcuhandeln uß sachen, doran vns, vnsern landen vnd luten macht liet; begernde ernstlich, das ir zewene treffliche uwers rats mit voller macht uff montag nach Jubilate schirsten zeytlich fur mittage bie vns zcu Grymme habt, vnd das in keynewiße vorhaldit; doran tut ir vns uber ernste meynung wolzudancke. Geben zcu Missen am sonntag Quasimodogeniti anno domini ꝛ. L octavo.

Zeddel: Auch sint wir gewarnet, das man ußgeschickt habe, vnser stete an zculegen vnd zcu mortbornnen, als an vnser stad Zwickaw bereit bewiiset, die mer danne ein virteil ußgebrant ist; begernde, das ir mit aller notturfft dofur gedenckt vnd bestellet, an thoren zcu hutten vnd nymand frembds inzulassen noch zcu herbergen, damit desglich schade vorwart moge werden. Datum ut supra.

Dem rate zu Dresdenn vnnsern liben getruwen.

Nach dem Orig. im Rathsarchiv zu Dresden.